

**Anartarfiit imaannik aamma imermik errortuivikumik eqqaaneq pillugu
Namminersorlutik Oqartussat nalunaarutaat nr. xx, xx. 2013-imeersoq**

Avatangiisit innarlitsaaliorneqarnissaannik Inatsisartut peqqussutaanni nr. 9-imi, 22. november 2011-meersumi, Inatsisartut inatsisaatigut nr. 1-ikkut 29. maj 2012-imeersukkut allannguuteqartinneqartumi § 10, imm. 1, nr. 15-16, § 18, imm. 1, nr. 1-7, § 48, § 56, imm. 1, § 66, imm. 3, aamma § 67, imm. 1 tunngavigalugit makku aalajangersarneqarput:

Siunertat atuuffiillu

§ 1. Nalunaarut anartarfiit imaannik aamma imermik errortuivikumik eqqaanermut atuuppoq.

Imm. 2. Aammattaaq nalunaarut pisortat inuinnaallu imermut errortuivikumut katersuiviinut atuuppoq.

Imm. 3. Sumiiffiit kommunit aggornerisa avataanniittut nunami susassaqaarfittut isigineqarput, aammalu Avatangiisinut Naalakkersuisumit aqutarineqarlutik.

Nassuiaatit

§ 2. Imeq sunaluunniit najugaqarfinit, suliffeqarfinit sanaartukkanillu allanit kuutsinneqartoq imertut errortuivikutut isigineqassaaq. Imermut errortuivikumut ilaatinneqartut tassaapput imeq errortuivikoq illunit kuutsinneqartoq, imeq errortuivikoq mingoqannginnerusoq, imeq errortuivikoq mingoqarnerusoq, sulinermit imeq errortuivikoq kuutsinneqartoq, imeq imaarsaanermi kuutsinneqartoq kiisalu imeq illut qaavinut nunallu qaavanut kuuttoq.

1) Imeq illut qaavinut nunallu qaavanut kuuttoq tassaavoq imeq nittaalarnerani illup qaavinut nunaminertanullu tamakkiisumik ilaannaasumilluunniit aalaakkaasunngorlutik sulianut torartoq. Imeq illut qaavinut nunallu qaanut kuuttoq akuutissanik, nunaminertanit taamaattunit nalinginnaasumik kuuttoqarnerani nassatarineqarsinnaasunik allanik akoqassanngilaq, imaluunniit allatut annertuumik akuugaassanani.

2) Illunit imeq errortuivikoq tassaavoq angerlarsimaffinit imeq kuutsinneqartoq, tassungalu ilaavoq imeq anartarfinit imermik errortortakkanit kuutsinneqartoq.

3) Imeq errortuivikoq mingoqannginnerusoq tassaavoq imeq illunit kuutsinneqartoq, tassungalu imeq anartarfinit imermik errortortakkanit kuutsinneqartoq ilaanngilaq.

4) Imeq errortuivikoq mingoqarnerusoq tassaavoq imeq anartarfinit imermik errortortakkanit kuutsinneqartoq.

5) Anartarfiit imaartakkat tassaapput eqqagassat inuit timaannit pisuusut, tassalu qooq anarlu.

6) Sulinermit imeq errortuivikoq tassaavoq suliffeqarfiit tunisassiornerinit ingerlanneqarnerinillu imeq kuutsinneqartoq.

- 7) Imermut errortuivikumut kuuffeqarfiit tassaapput kussinerit ammasut, taamatullu aqqusersuutit matoqqasut atortullu allat, katersuivimmuut kuutsitsiviusut imaluunniit imermik errortuivikumik akuiaaviusut il.il.
- 8) Imermut errortuivikumut kuuffeqarfiit pisinnaasaat tassaapput erngup errortuivikup annertussusii, akuutissanik mingutsitsisunik, nunap kuuffeqarfittut aalajangersarneqartup iluani illumit ataatsimit amerlanerusunilluunniit kuutsinneqarsinnaasunik imaqartut.
- 9) Pisortat imermut errortuivikumut kuuffeqarfii tassaapput imermut errortuivikumut kuuffeqarfiit, ingerlanneqarnerminni aamma/imaluunniit aserfallatsaaliorneqarnerminni kommunalbestyrelsinit akisussaaffigineqartut.
- 10) Namminersortut imermut errortuivikumut kuuffeqarfii tassaapput imermut errortuivikumut kuuffeqarfiit, nr. 10-mut ilaatinneqanngitsut.
- 11) 1 personækvivalent (PE), nalunaarummi matumani allassimasoq tassaavoq, ukiumut akuutissat uumassusillit 21,9 kg-t, iltimik biokemiskiusumik (BI5), ukiumut kvælstof-imik katillugit 4,4 kg-nik imaluunniit ukiumut fosfor-imik katillugit 1,0 kg-nik atuisutut uuttorlugit.
- 12) Anartarfiit imermik errortortakkat tassaapput anartarfiit imermut imermullu errortuivikumut kuuffeqarfimmuut, soorlu pisortat kuuffeqarfiinut katersuivimmulluunniit atassuserneqarsimasut.
- 13) Anartarfik imaartagaq tassaavoq eqqiluisaarnermut atortulersuut imilerneqartussaanngitsoq imaluunniit annikitsuaraannarmik imilersorneqarsinnaasoq (anartarfiit kuuffeqanngitsut). Anartarfiit taamaattut tassaasinnaapput puussiartalertakkat imaluunniit siparnilertakkat, kisiannili aamma tassaasinnaallutik anartarfiit nunamut issumullu itersaliorsimasat.
- 14) Illuliornermut malittarisassat, kiisalu illuliornermut inatsisini maleruagassat aalajangersarneqarsimasut sukkulluunniit atuuttut naapertorlugit imermut errortuivikumut peqqussutit malillugit katersuivik tassaavoq tanki ussissoq qerinaveersaartinneqartoq kuuffeqanngitsorlu, kalerrisaarutitalik imaluunniit ulikkaarnermini allatut nalunaarsuutitalik, kiisalu imaarneqarnissamut maqitsivilik.
- 15) Imeq naqitsinilik tassaavoq imeq, aqqusersuutit qerinaveersaartinneqartut aqutigalugit naqitsineq atorlugu illuni ataasiakkaani il.il. maqinneqartartoq.
- 16) Imeq pajugutaasoq tassaavoq imeq, pilersuinerimut aqqissuussinermit akuerisamiit illup nammineerluni toqqorsivittut tankianut, pisariaqartitsineq malillugu maqitsivigineqartartumut pajugutigineqartoq.
- 17) Kuuffiit tassaapput kuuffiit matoqqasut, illut imermik errortuivikumik kuutsitsisut ataannut silataannulluunniit inissinneqarsimasut.
- 18) Nuna kuuffeqarfik tassaavoq sumiiffik, kuuffinnut atugassatut aalajangerneqarsimasoq, nalinginnaasumillu imeq errortuivikoq assatamut kuutsinneqarsinnaavoq. Nuna kuuffeqarfiusoq immikkoortunik arlalinnik kuuffeqarfeqarsinnaavoq, kisiannili imaanut ataasiinnarmik kuuffeqarluni.
- 19) Katersuivik tassaavoq sumiiffik, imermik errortuivikumik kuuffimmit ataatsimit amerlanerusunilluunniit sunniuteqarfigineqartoq.

§ 3. Atuisinnaatitaasut tassaapput suliffeqarfiit nunaminertanik, nalinginnaasumik nunaminertanik atugassiiffiusartunik atuisinnaatitaasut tamarmik. Tamanna utaqqiisaagallartumik imaluunniit ataavartumik atugassiisarnermut, kiisalu nunaminertanut sanaartorfigineqarsimanngitsunut atuuppoq.

Imm. 2. Atuisinnaatitaasunut aamma suliffeqarfiit, peqatigiiffiit aaqqissuussinernullu aaqqissuisunut, ataavartumik imaluunniit utaqqiisaagallartumik inunnik amerlasuunik katersuutsitsisunut sanilliunneqassapput.

Imermut errortuivikumut pilersaarut

§ 4. Kommunalbestyrelsi kommunimi illoqarfinni nunaqarfinnilu imermik errortuivikumik eqqaanissamut pilersaarusiussaaq. Kiisalu kommunalbestyrelsi asimut tunngatillugu pilersaarusiorsinnaavoq. Imermut errortuivikumut pilersaarut minnerpaamik paasissutissanik ukuninnga imaqaassaaq:

- 1) Imermut errortuivikumut pilersaarut qanoq kommunimut pilersaarummut, § 34 naapertorlugu katersuivinnut pilersaarummut kiisalu aningaasaqarnermut pilersaarummut naleqqiunneqarsimanersoq.
- 2) Nunanut kuuffeqarfiusunut ataasiakkaanut killiliussat.
- 3) Imermut errortuivikumut kuuffeqarfinnut pioreersunut pilersaarutaasunullu nunap assinga, imermut errortuivikumut kuuffeqarfiit pisortanit namminersortunilluunniit pigineqarnersut nalunaarsorlugu.
- 4) Illut suut pisortat imermut errortuivikumut kuuffeqarfiinut attavilerneqarsimanersut, aammalu illut suut namminersortut imermut errortuivikumut kuuffeqarfiinut attavilerneqarsimanersut, kiisalu kuutsitsisartunut ataasiakkaanut nassuiaatit.
- 5) Kommunip imermut errortuivikumut kuuffeqarfiutaasa iluarsaanneqarnissaannut aserfallatsaaliorneqarnissaannullu pilersaarut, tassungalu ilanngullugu pingaarnersiuinissaq.
- 6) Suliniutit imermut errortuivikumut pilersaarummi nassuiarneqarsimasut atulersinneqarnissaannut piffissamut pilersaarut.
- 7) Katersuviit suut nunatanit ataasiakkaanit imermik errortuivikumik kuutsitsivigineqarsimanersut, aamma kuutsitsivissanut, kuuffiit inissiffissaannut aammalu erngup errortuivikup kuutsinneqartussatut naatsorsuutigineqartup annertussusissaanut kissaataasinnaasut. Aammattaaq saliinnermut iliuusissaasinnaasut aamma katersuviit pitsaassusissaattut kissaatigisat nassuiarneqarsinnaapput.
- 8) Pisortat kuuffeqarfiutaannik pilersitsinermut, iluarsaassinermut ingerlatsinermullu isertitassatut aningaasartuutissatullu naatsorsuutigineqartut suunersut.

Imm. 2. Aalajangiinerup kingorna ukiut arfinilikkaarlugit kommunimi imermik errortuivikumik eqqaanermut pilersaarutit kommunalbestyrelsip iluarsaattassavai.

Stk. 3. Illoqarfinni ataasiakkaani imermut errortuivikumut pilersaarut saqqummersoq siulleq kingusinnerpaamik 1. januar 2016-imi akuerineqarsimassaaq.

Imm. 4. Nunaqarfinni ataasiakkaani imermut errortuivikumut pilersaarut saqqummersoq siulleq kingusinnerpaamik 1. januar 2018-imi akuerineqarsimassaaq.

§ 5. Imermut errortuivikumut pilersaarummut siunnersuutip kommunalbestyrelsimit akuersissutigineqannginnerani, imermut errortuivikumut pilersaarummut missiliuut Avatangiisinut Naalakkersuisumut nassiunneqassaaq, taassumalu tigusinermiiniit sapaatit akunneri arfineq pingasut qaangiutinnginnerini tassunga oqaaseqaatigisinnaasani saqqummiutissavai.

§ 6. Imermut errortuivikumut pilersaarummut siunnersuutip akuerineqarnerata kingorna, kommunalbestyrelsip siunnersuut tamanut ammasumik saqqummiutissavaa.

Imm. 2 Imermut errortuivikumut pilersaarummut siunnersuut sivikinnerpaamik sapaatit akunnerini arfineq pingasuni tamanut ammasumik, aammalu misissorneqarsinnaasunngorlugu oqaaseqarfigineqarsinnaasunngorlugulu saqqummitinneqassaaq. Imermut errortuivikumut pilersaarummut siunnersuut kommunip nittartagaani pissarsiarineqarsinnaassaaq.

Imm. 3. Tamanut ammasumik saqqummiussinermi siunnersuummut oqaaseqaateqarnissamut allannguutissanilluunniit siunnersuuteqarnissamut piffissaliussaq allanneqassaaq.

Imm. 4. Tamanut ammasumik saqqummiussinerup peqatigisaanik imermut errortuivikumut pilersaarummut siunnersuut akuerisaq Avatangiisinut Naalakkersuisumut, Nuna tamakkerlugu pilersaarusiortarnermut Naalakkersuisumut, Nakorsaaneqarfimmut aamma Nukissiorfinnut nassiunneqassaaq. Akerliliissuteqarnissamut oqaaseqaateqarnissamullu piffissarititaasoq allanneqassaaq.

§ 7. Oqaaseqarnissamut piffissarititaasoq naappat, kommunalbestyrelsip imermut errortuivikumut pilersaarutip nutaamik suliarereernerani siunnersuut inaarutaasumik akuerisinnaavaa. Tamatuma peqatigisaanik akerliliissutit allannguutissatullu siunnersuutit piffissami saqqumititsiviusumi tiguneqartut suliarineqassapput.

Imm. 2. Kommunalbestyrelsip imermut errortuivikumut pilersaarummut inaarutaasumik akuersissuteqarnerani, kommunalbestyrelsi siunnersuummik tamanut ammasumik saqqumitinneqartumik allannguisinnaavoq. Allannguutit annertuutut imaluunniit pilersaarutip imaanut tunngaviusunut uniuttutut kommunalbestyrelsimit naliliiffigineqarpata, imermut errortuivikumut pilersaarutissatut siunnersuut tamanut ammasumik saqqummiuteqqinneqassaaq, akerliliissuteqarnissamut sivikinnerpaamik sapaatit akunnerinik arfinilinnik piffissaqartitsiviusumik. Tamanut ammasumik saqqummiusseqqinneq § 6 naapertorlugu ingerlanneqassaaq.

§ 8. Kommunalbestyrelsi imermut errortuivikumut pilersaarutip inaarutaasumik akuerineqarnerata kingorna pisariaqanngitsumik uninngatitsinani tamanut ammasumik nalunaaruteqassaaq.

Imm. 2. Kommunalbestyrelsi imermut errortuivikumut pilersaarutip tamanut ammasumik nalunaarutigineqartup naqinneranik Avatangiisinut Naalakkersuisumut, Nuna tamakkerlugu pilersaarusiortarnermut Naalakkersuisumut, Nakorsaaneqarfimmut aamma Nukissiorfinnut ilisimatitsissutitut nassiussissaaq.

Imm. 3. Kommunip imermut errortuivikumut pilersaarut tamanut ammasumik nalunaarutigineqartoq kommunip nittartagaanut ikkutissavaa, taamaalilluni tamanit pissarsiarineqarsinnaasunnngortissallugu.

§ 9. Kommunalbestyrelsi imermut errortuivikumut pilersaarutit akuerineqartut tunngavigalugit kommunimi imeq errortuivikoq qanoq isumagineqassanersoq ataatsimut takussutissiussaaq.

Imm. 2. Takussutissiaq ataatsimoortoq kommunalbestyrelsip anartarfiit imaartakkat erngullu errortuivikup kommunimi isumagineqarneranut anguniagaasa suunerinik imaqassaaq.

Imm. 3. Ataatsimut takussutissiap naqinnera siulleq kingusinnerpaamik 1. januar 2020-mi akuerineqarsimassaaq.

Imm. 4. Ataatsimut takussutissiaq Avatangiisinut Naalakkersuisumut, Nuna tamakkerlugu pilersaarusiortarnermut Naalakkersuisumut, Nakorsaaneqarfimmut aamma Nukissiorfinnut ilisimatitsissutitut nassiunneqassaaq.

*Imermut errortuivikumut kuuffeqarfiit imermut errortuivikumut kuuffinnut
attavilerneqartarneri*

§ 10. Pisortat imermut errortuivikumut kuuffeqarfiutaannut tunngatillugu, pisortat aqqusiniutaannut qaninnermut imaluunniit nuna pineqartoq aqputigalugu kuuffiliisoqarsimappat, imermut errortuivikumut pilersaaruteqarfiusup iluani nunami kuuffeqarfiusumi aqputit matoqqasut aqputigalugit kuuffinnut imermut errortuivikumut attaviliinissaq atuisinnaatitaasut nammineq akilikkaminnik pisussaaffigaat.

Imm. 2. Nunami kuuffeqarfittut aalajangersarneqarsimasumi illut pioreersut imermik errortuivikumik kuuffeqarfinnut attaviliinissamut, pisortat aqqusiniutaannut qaninnermut imaluunniit nuna pineqartoq aqputigalugu kuuffeqarfiliinerup kingorna ukiut marluk piffissaritinneqarput. Kommunalbestyrelsip pineqartut piffissaliussaq pillugu allakkatigut ilisimatissavai. Ukiunik marlunnik piffissaliineq siusinnerpaamik imermut errortuivikumut pilersaarutip aalajangiunneqarnerani atutilissaaq.

Imm. 3. Kisiannili kommunalbestyrelsip illumi pissutsinik immikkut ittumik nalileereerneratigut, tassungalu ilanngullugu anartarfiliinissamut periarfissaqartoqannginnera tunngavigalugu, attaviliinissamut pisussaaffeqarnermik saneqqutsinissamut immikkut ittumik akuersissuteqarsinnaavoq.

§ 11. Sanaartorfiusoq pioreersoq imermik naqitsinilimmik pilerneqarpat, tamatuma peqatigisaanik kuuffeqarfimmut aqqusersuummik akuerisamik kuuffiliinissaq, imaluunniit illuniit imermut errortuivikumut katersuivinnik immikkoortunik ikkussuinissaq kommunalbestyrelsip qulakkiissavaa.

§ 12. Sanaartorfissagissaaneq, pisortat kuuffeqarfinnut aqqusersuutaat aamma pisortat aqqusiniutaat pillugit Inatsisartut inatsisaat nr. 16, 17. november 2010-imeersoq naapertorlugu

kommunalbestyrelsi akuersissuteqarsimappat, imermut errortuivikumut kuuffeqarfimmut tamarmiusumut akuersissut malillugu kuutsitsisinaanissaq kommunalbestyrelsip qulakkiissavaa.

§ 13. Ikkuffik inuinnaat imermut errortuivikumut kuuffeqarfianut atassuserneqassappat, imermut errortuivikumut kuuffeqarfimmik piginnittup kommunalbestyrelsi ilisimatissavaa.

Imm. 2. Imermut errortuivikumut kuuffeqarfimmut atassusiinermi, kuuffeqarfimmik piginnittup kuuffiit tamakkiisumik atorneqarnerini kuuffeqarfimmi pisinnaasassatut akuerisat iluanni annertussuseqarnissaat qulakkiissavaa.

Sikukkut, nunakkut, imermik tarajulimmik tarajoqanngitsumillu kuutsitsinissamut akuersissutit

§ 14. Imermik errortuivikumik katersuivimmut kuutsitsisarnermi kuutsitsinissamut akuersissuteqartoqarnissaa pisariaqarpoq.

Imm. 2. Kuutsitsinissamut akuersissuteqartoqarnissaanik qinnuteqaat allaganngorlugu tunniunneqassaaq, aammalu paasissutissanik ilanngussaq 1-imi taaneqartunik ilaqartinneqassalluni.

Imm. 3. Kuutsitsinissamut akuersissuteqartoqarnissaanik qinnuteqaat kommunalbestyrelsimut nassiunneqassaaq.

Imm. 4. Inoqutigiinnit erngup errortuivikup 50 PE tikillugu annertussuseqartup imermut errortuivikumut kuuffeqarfikkut, kangerlummut imaanullu kuuffeqartukut kuutsitsinissamut kommunalbestyrelsi akuersissuteqartarnermi oqartussaasuvoq.

Imm. 5. Imermik errortuivikumik nunamut kussinernullu ammaannartunut, kangerlummut imaanullu kuuffeqartunut kuutsitsinissamut kommunalbestyrelsi akuersissuteqartarnermi oqartussaasuvoq.

Imm. 6. Suliani allani, tassungalu sulinermi imermik errortuivikumik kuutsitsisarnermut, kiisalu kommunalbestyrelsimit qinnuteqaatinut tamanut tunngasuni Avatangiisinut Naalackersuisoq akuersissuteqartarnermi oqartussaasuvoq.

Imm. 7. Suliani Avatangiisinut Naalackersuisup oqartussaaffigisaani qinnuteqaatit kommunalbestyrelsip Avatangiisinut Naalackersuisumut ingerlateqqittartussaavai. Suliat ingerlateqqinneqartut aamma kommunalbestyrelsip qinnuteqaammut oqaaseqaataanik ilaqartinneqartassapput, pingaartumik imermut errortuivikumut pilersaarummut tunngatillugu.

Imm. 8. Imm. 3-5-imi allassimasut apequtaatinnagit suliffeqarfinit, avatangiisit innarlitsaaliorneqarnissaannik Inatsisartut peqqussutaanni nr. 9-imi, 22. november 2011-meersumi, kingusinnerusukkut allannguuteqartinneqartumi kapitali 5-imi ilaatinneqartunit kuutsitsisarnermut Avatangiisinut Naalackersuisoq akuersissuteqartarnermi oqartussaasuvoq. Kapitali 5 naapertorlugu suliffeqarfinit qinnuteqaatit Avatangiisinut Naalackersuisumut toqqaannartumik nassiunneqartassapput.

§ 15. Akuersissuteqartarnermi oqartussaasut kuutsitsinissamut akuersissummi minnerpaamik piumasaqaatit uku aalajangersassavaat:

1) Imermut errortuivikumut kuuffeqarfiup pisinnaasai.

- 2) Kuutsitassap annertussusia katitigaaneralu.
- 2) Ilusilersugaanera.
- 3) Nammineerluni nakkutilliineq.

Imm. 2. Akuersissuteqartarnermut oqartussaasut kuutsitsinissamut akuersissummi saliisarnermi iliuusissanut piumasaqaateqarsinnaapput.

Imm. 3. Kuutsitsinissamut akuersissut piffissamut killiliinissamut piumasaqaammik imaqarsinnaavoq.

Imm. 4. Kuutsitsinissamut akuersissuteqarnermi akuersissuteqartarnermut oqartussaasut tunngavissat uku naammassineqarnissaat qulakkiissavaat:

- 1) Imermut errortuivikumut kuuffeqarfimmi pilersaarusionerq aamma nunaminertat atornerqartarnerat pillugit Inatsisartut inatsisissaat nr. 17, 17. november 2010-imeersoq tamatumunnga tunngavigineqartussaq unioqqutinneqassanngilaq.
- 2) Imermut errortuivikumut kuuffeqarfimmi imermut errortuivikumut pilersaarut malinneqassaaq.

§ 16. Akuersissutit qinnuteqartumut, Nakorsaaneqarfimmut aammalu Avatangiisinut Naalakkersuisumut imaluuniit kommunalbestyrelsimut nassiunneqassapput, tassani akuersissuteqarnermut oqartussaanerup arlaata isumagineraa apeqqutaalluni.

§ 17. Imermut errortuivikumut kuuffeqarfiit pioreersut, siusinnerusukkut maleruagassat naapertorlugit sananeqarsimasut atornerqaannarsinnaapput.

§ 18. Imermut errortuivikumut kuuffeqarfik imaluunniit pissutsit imermut errortuivikumut kuuffeqarfimmut sunniuteqartut annertuumik allanngortinneqarpata, tassungalu ilanngullugu kuuffik nuunneqarpat, § 14 naapertorlugu nutaamik akuersissuteqartoqarnissaa pisariaqarpoq.

Imm. 2. Kiisalu erngup errortuivikup, kuuffeqarfikkut kuutsinneqartup annertussusia katitigaaneraluunniit annertuumik allannguuteqarpat, § 14 naapertorlugu nutaamik akuersissuteqartoqarnissaa pisariaqarpoq.

Imm. 3. Imm. 1 aamma imm. 2 naapertorlugu allannguineq annertuujunersoq akuersissuteqartarnermi oqartussaasut aalajangertussaavaat, taamaattumillu nutaamik akuersissuteqartoqarnissaa pisariaqarpoq.

Akiliutit

§ 19. Akuersissuteqartarnermut oqartussaasut imermik errortuivikumik eqqaanissamut akuersissuteqarnermut akiliummik aalajangersaasinnaapput.

§ 20. Kommunalbestyrelsi pisortat imermik errortuivikumik kuutsitsinissamut kuuffeqarfii aqputigalugit imermik errortuivikumik eqqaanermut ukiumoortumik akiliummik aalajangersaasinnaapput.

Imm. 2. Imermik errortuivikumik eqqaanermut ukiumoortumik akiliut atuisinnaatitaasup imermik atuinera tunngavigalugu aalajangerneqarsinnaavoq.

Imm. 3. Imermik errortuivikumik eqqaanermut ukiumoortumik akiliut ukiumoortoq aningaasanik siunissami imermik errortuivikumut kuuffeqarfinnik iluarsaassinermut ineriartortitsinermulluunniit atugassanik imaqarsinnaavoq.

Anartarfiit imaartakkat

§ 21. Anartarfiit imaartakkat taamaallaat anartarfittut atorneqassapput.

§ 22. Inatsisini allani maleruagassanik aalajangersaasoqarsimatinnagu, Kommunalbestyrelsi anartarfiit imaartakkat amerlassusissaannut ilusissaannullu aalajangiissapput, sumiiffinnullu taakkununga tammaarsimaarfiit aammalu sumiiffiit inuit amerlasuut ataavartumik utaqqiisaagallartumillu katersuuffigisartagaat ilaatinneqarput. Matumani illoqarfiit nunaqarfiillu iluini avataannilu sumiiffiit pineqarput.

Imm. 2. Kommunalbestyrelsi imm. 1 naapertorlugu kommunip malittarisassiaanni sumiiffinnut annerusunut malittarisassanik aalajangersaasinnaavoq.

§ 23. Imaajaasarnermut aqqissuussinernut atatillugu kommunalbestyrelsi malittarisassiani anartarfinnik imaartakkanik aalajangersimasunik atuinissamut peqqussuteqarsinnaavoq. Anartarfinnik imaartakkanik puussiartalinnik atuinissaq peqqussutigineqarpat, anartarfiit puussaat kommunalbestyrelsimit pilersuutigineqassapput.

§ 24. Anartarfiit puuinik siparninilluunniit aasassanik/katersugassanik/imaagassanik illup silataanut inissiisoqassappat, imaat qimminit, timmissanit uumasunilluunniit allanit anguneqarsinnaajunnaarlugit inissinneqassapput.

Anartarfiit imaartakkat imaannik imermullu errortuivikumut katersuiviit imaannik eqqaasarneq

§ 25. Kommunalbestyrelsi anartarfiit imaartakkat imaannik imermullu errortuivikumut katersuiviit imaannik eqqaavissatut periarfissamik innersuussissaaq.

Imm. 2. Eqqaavissatut periarfissaq innersuunneqartoq atorneqassaaq.

Imm. 3. Illoqarfimmi nunaqarfimmiluunniit illut tamarmik kuuffeqarfimmut atassuserneqarnissaq anguppasuk, kommunalbestyrelsip imm. 1 naapertorlugu anartarfiit imaannut innersuussisussaatitaanera atorunnaassaaq.

§ 26. §§ 4-9-mi imermut errortuivikumut aalajangersakkat eqqarsaatigalugit illoqarfinni nunaqarfinnilu anartarfiit imaartakkat imaannik imermullu errortuivikumut katersuiviit imaannik eqqaanermut majorallaffimmik eqqaanermulluunniit aqqissuussamik akuerisamik allamik pilersitsinissaq kommunalbestyrelsip qulakkiissavaa.

Imm. 2. § 25, imm. 3 naammassineqarpat anartarfiit imaartakkat imaannik imermullu errortuivikumut katersuiviit imaannik eqqaanermut majorallaffimmik eqqaanermulluunniit aaqqissuussamik akuerisamik allamik pilersitsinissamut pisussaaffik atorunnaassaaq.

§ 27. Asimi sanaartukkap qanoq ittuunera tunngavigalugu kommunalbestyrelsimit innersuussutit naapertorlugit anartarfiit imaartakkat imaannik atuisinnaatitaasup eqqaanissaa kommunalbestyrelsip piumasarisinnaavaa.

Imm. 2. Asimi erngup errortuivikup annertussusia sanaartukkallu qanoq ittuunera tunngavigalugu kommunalbestyrelsimit innersuussutit naapertorlugit imermut errortuivikumut katersuiviit imaannik atuisinnaatitaasup eqqaanissaa kommunalbestyrelsip piumasarisinnaavaa.

§ 28. Illoqarfinni nunaqarfinnilu eqqaanissamut aaqqissuussinerit § 26-imi taaneqartut sananeqannginnerminni Avatangiisinut Naalakkersuisumit akuerineqartussaapput.

Imm. 2. Eqqaanermut aaqqissuussinerit pioreersut atorneqarneri akuersissutitaqanngitsumik ingerlaannarsinnaapput.

Imm. 3. Eqqaanermut aaqqissuussinerit pioreersut piffissaliussap qaangiutinnginnerani akuerineqassasut Avatangiisinut Naalakkersuisoq aalajangersinnaavoq. Akuersissuteqarnermi eqqaanermut aaqqissuussinerit pioreersut allanngortinneqarnissaat nuunneqarnissaallu pisariaqarsinnaavoq.

Imm. 4. § 28 naapertorlugu piffissaliussaq minnerpaamik ukiumik ataatsimik sivilisussuseqassaaq.

Imaajaasarnermik aaqqissuussinerit

§ 29. Kommunalbestyrelsi illoqarfinni nunaqarfinnilu anartarfiit imaartakkat imaannik imermullu errortuivikumut katersuiviit imaannik imaajaanermut aaqqissuussinernik atuutsitsilersinnaavoq.

Imm. 2. Kommunalbestyrelsi eqqorneqartussanut ukiunik marlunnik sioqqutsisumik nalunaaruteqarluni anartarfiit imaartakkat imaannik imermullu errortuivikumut katersuiviit imaannik imaajaanermut aaqqissuussinernik atulersinneqarsimasinnaasunik atorunnaarsitsisinnaavoq.

§ 30. Asimi avatangiisit peqqissutsimilu pissutsit tunngavigalugit pisariaqartinneqartutut naliliisoqarpat, kommunalbestyrelsi anartarfiit imaartakkat imaannik imermullu errortuivikumut katersuiviit imaannik imaajaanermut aaqqissuussinernik atuutsitsilersinnaavoq.

§ 31. Kommunimi anartarfiit imaartakkat imaannik imermullu errortuivikumut katersuiviit imaannik imaajaanermut aaqqissuussinernik atuutsitsisoqarpat, aaqqissuussineq atorneqassaaq.

Imm. 2. Anartarfiit imaartakkat imaannik imermullu errortuivikumut katersuiviit imaannik imaaajaanermut akiliutinik kommunalbestyrelsi ukiumoortumik aalajangersaasinnaavoq.

Imm. 3. Anartarfiit imaartakkat imaannik imermullu errortuivikumut katersuiviit imaannik imaaajaanermut akiliut ukiumoortoq aningaasanik siunissami iluarsaassinermut ineriartortitsinermulluunniit atugassanik imaqarsinnaavoq.

§ 32. Anartarfiit imaartakkat imaannik imermullu errortuivikumut katersuiviit imaannik suliaqarneq assartuinerlu peqqissutsikkut avatangiisinullu isumannaatsumik, aammalu kommunalbestyrelsip aalajangersagai naapertorlugit ingerlanneqassapput.

Imm. 2. Suliffeqarfik kommunimit ingerlanneqanngitsoq anartarfiit imaartakkat imaannik imermullu errortuivikumut katersuiviit imaannik eqqaasarnermik tamakkiisumik taassumaluunniit ilaanik suliaqassasoq kommunalbestyrelsi aalajangersinnaavoq. Anartarfiit imaartakkat imaannik imermullu errortuivikumut katersuiviit imaannik imaajaasarnerup kommunalbestyrelsip innersuussutai naapertorlugit ingerlanneqarnissaanik kommunalbestyrelsi qulakkeerissaaq.

Anartarfiit imaartakkat imaannut imermullu errortuivikumut katersuivinnut maleruaqqusat

§ 33. Kommunip illoqarfiani nunaqarfiinilu anartarfiit imaartakkat imaannik imermullu errortuivikumut katersuivinnik imaajaaneq eqqaanerlu pillugit maleruaqqusat erseqqinnerusut kommunalbestyrelsip maleruaqqusani aalajangersassavai.

Imm. 2. Maleruaqqusat taakku paasissutissanik makkuninnga imaqqassapput:

- 1) Imermut errortuivikumut katersuiviit imaasa anartarfiillu imaartakkat imaasa eqqarneqarfigisinnaasaat.
- 2) Anartarfiit imaartakkat akuerisat suussusii anartarfiillu puussiartai.
- 3) Erngup errortuivikup katitigaanera.
- 4) Kommunimi anartarfiit imaartakkat imaannik imermullu errortuivikumut katersuiviit imaannik imaajaasarnerit.
- 5) Anartarfilerisut anartarfinnik imaartakkanik imaarsinissaannut imaluunniit siparnit anartarfiilluunniit puussiartaasa illup silataani inissinneqarnissaat pillugit malittarisassat.
- 6) Kommunit imaajaasarnermi aaqqissuussinerinik atuinermut akiliutit.

Katersuiveqarnissamut pilersaarut

§ 34. Avatangiisinut Naalackersuisoq katersuivinnut pilersaarummik, katersuiviup atorneqarneranut uuttuutinik pingaarnernik aammalu avatangiisit qanoq issusissaannut piomasaaqatinik allattuiviusumik suliaqassaaq, taakkunungaluaq ilaatinneqassapput pissutsit isikkussaannut eqqiluisaarnermullu tunngasut. Anguniakkat anguniarlugit imermik errortuivikumik saliiveqarnissaaq pisariaqartinneqarpat, pilersaarut piomasaaqatinik pingaarnernik imaqqassaaq. Katersuiviit pilersaarusiornissaannut siunnersuut tamanut ammasumik saqqummiunneqassaaq, aammalu inaarutaasumik aalajangiinissaaq

sivikinnerpaamik qaammatinik pingasunik sioqqullugu kommuninut Nakorsaaneqarfimmullu nassiussuunneqassalluni.

Aalajangersakkat allat

§ 35. Nalunaarut manna naapertorlugu aalajangiisoqannginnerani Nakorsaaneqarfik tusarniarneqassaaq.

Nakkutilliinermut oqartussaasut.

§ 36. Nalunaarut manna naapertorlugu kommunalbestyrelsi nakkutilliinermi oqartussaasuvoq, taamaattorli imm. 2-mut atuutinngilaq.

Imm. 2. Avatangiisinut Naalakkersuisoq kommunini imermut errortuivikumut kuuffeqarfikkut kuutsitsisarnermut aammalu suliffeqarfinit, avatangiisit innarlitsaaliorneqarnissaannik Inatsisartut peqqussutaanni nr. 9-imi, 22. november 2011-meersumi, Inatsisartut inatsisaatigut nr. 1-ikkut 29. maj 2012-imeersukkut allannguuteqartinneqartumi kapitali 5-imi ilaatinneqartunit kuutsitsisarnermut nakkutilliisutut oqartussaasuvoq.

Nakkutilliineq peqqusissuteqartarnerlu

§ 37. Paasissutissanik naliliinernillu nutaanik, ilisimatusarnermi misissuinerit ineneri nutaat ilisimasalluunniit allat nutaat tunngavigalugit paasissutissanik ilisimaneqareersunik allannguisunik takkuttoqarpat, imermi errortuivikumi akuutissat pillugit misissugassanik tigusinissamik, misissueqqissaarnernik uuttuinernilluunniit nakkutilliinermut oqartussaasut peqqusisinnaapput.

§ 38. Suliani, attaviliiffissat pioreersut imermut errortuivikumut kuuffeqarfiit pisinnaasaattut imermullu errortuivikumut akuersissutini piumasaqaatit akuerineqartut naammassinissaannut ajornartorsiortitsiviusuni attaviliinissamut akuersissummik nutaamik piniarnissaq nakkutilliinermut oqartussaasut piumasarisinnaavaat.

§ 39. Suliani, attaviliiffissat pioreersut avatangiisinut immikkut ittumik ajornartorsiortitsippata imaluunniit isumannaallisaanermut peqqissutsimullu ajornartorsiortitsippata, § 14 naapertorlugu attaviliinissamut akuersissummik nutaamik piniarnissaq nakkutilliinermut oqartussaasut piumasarisinnaavaat.

§ 40. Imeq illut qaavinut nunallu qaavanut kuuttoq immikkut ittumik ajoqutaappat, erngup illut qaavinut nunallu qaavanut kuuttup imermut errortuivikumut kuuffeqarfimmu, kangerlummumut imaanulluunniit kuuffeqartumut kuuffilerneqarnissaa kommunalbestyrelsip atuisinnaatitaasumut peqqussutigisinnaavaa.

§ 41. Inuinnaat pisortalluunniit imermut errortuivikumut kuuffeqarfiinik sananermi, allannguinermi iluarsaassinermiluunniit imermut errortuivikumut saliiivimmik sananissamik, imermut errortuivikumut kuuffiit nuunneqarnissaannik allatulluunniit iliuuseqarnissamik, soorlu katersuiviugallartumut kuutsitsinissamik akuersissuteqartarnermut oqartussaasut peqqusisinnaapput.

§ 42. Imermut errortuivikumut kuuffeqarfimmut attaviliineq imaluunniit imermik errortuivikumik kuutsitsineq peqqissutsimut avatangiisinulluunniit ulorianartorsiortitsippat, nakkutilliinermi oqartussaasut peqqussuteqarsinnaapput inerteqquteqarsinnaallutilluunniit.

Imm. 2. Imermut errortuivikumut kuuffeqarfimmut attaviliineq imaluunniit imermik errortuivikumik kuutsitsineq imermut errortuivikumut katersuiviup ingerlanneqarneranut ajornartorsiortitsippat, soorlu milittoorsimappat, orsoq katersuussimappat imaluunniit akuutissanit avatangiisinut ajoqutaasunit sunniuteqarfigineqarpat nakkutilliinermut oqartussaasut peqqussuteqarsinnaapput inerteqquteqarsinnaallutilluunniit.

Imm. 3. Akuusunut tusarniaareernikkut nakkutilliinermut oqartussaasut peqqussuteqarnermut inerteqquteqarnermulluunniit aalajangiineq allakkatigut akuusunut nalunaarutigissavaat, Nakorsaaneqarfimmut ilisimatitsissummik ilallugu. Aalajangiinerit peqqussuteqarnermi inerteqquteqarnermiluunniit naammassinninnissamut piffissaliussamik imaqassapput.

§ 43. Imermut errortuivikumut kuuffeqarfimmut attaviliineq imaluunniit imermik errortuivikumik kuutsitsineq peqqissutsimut annertuumik ajornartorsiortitsippat, kiisalu annertuumik mingutsitsinissaq mingutsitsinerulluunniit siaruarnissaa pinngitsoorniarlugu pilertortumik iliuuseqartoqarnissaa pisariaqartillugu, nakkutilliinermi oqartussaasut oqaasiinnaat atorlugit peqqussuteqarnissaat inerteqquteqarnissaallu, tamatumalu piaartumik naammassineqarnissaa aalajangiunneqarsinnaavoq.

Imm. 2. Oqaasiinnaat atorlugit peqqussuteqarneq inerteqquteqarnerluunniit nakkutilliinermi oqartussaasunit ullut 14-it qaangiutsinnagit allakkatigut uppersararneqassaaq, taamaattoqanngippallu peqqussut atorunnaassaaq.

§ 44. Anartarfinnut imaartakkanut aamma anartarfiit imaartakkat imaannik eqqaanermut kiisalu erngup errortuivikup eqqaavissaannut tunngatillugu kommunalbestyrelsi peqqussuteqarsinnaavoq inerteqquteqarsinnaallunilu, uku siunertaralugit:

- 1) Mingutsitsinissamik pinaveersaartitsineq
- 2) Peqqissutsimi pissutsinik pitsanngorsaaneq
- 3) Eqqiluisaarnermik pitsanngorsaaneq
- 4) Anartarfilerisut ajornartorsiutaannik annikillititsinissaq

Imm. 2. Peqqussuteqarnermi anartarfiit imaartakkat amerlanerulernissaat, eqqiluisaanerup pitsaanerulernissaa, aqqutissat imaqartinneqannginnissaat, anartarfiit imaarneqartarnerisa akulikinnerulernissaa assigisaalluunniit piumasarineqarsinnaapput.

§ 45. Nakkutilliinermi suliani, peqqissutsimik ulorianartorsiortoqarnera tamatumaluunniit pisinnaanera tunngavigalugu peqqussuteqarnissamik inerteqqussuteqarnissamilluunniit kissaateqarfiusuni tamani Nakorsaaneqarfik aalajangiinermut ilaatinneqartassaaq.

§ 46. Nalunaarut manna naapertorlugu peqqussutit inerteqqutilluunniit suliffeqarfinnut inuussutissarsiornermik ingerlataqartunut tunniunneqartut tunngaviusumik ingerlatsisumut tunniunneqartassapput. Ingerlatsisoq kinaassusersineqarsinnaanngippat atuisinnaatitaasoq peqqussutinik inerteqqutinilluunniit naammassininnissamut akisussaatinneqassaaq.

Imm. 2. Nalunaarut manna naapertorlugu peqqussutit inerteqqutilluunniit illunut inuinnarnut inissiatut atorneqartunut tunngatillugu atuisinnaatitaasumut tunniunneqartassapput.

Imm. 3. Peqqussummik inerteqqummilluunniit tigusisoq peqqussutip naammassinissaanut akisussaasuvoq, aammalu nalunaarut manna naapertorlugu peqqussuteqarnermut inerteqquteqarnermulluunniit aningaasartuutit akilertussaallugit.

Saneqqutsinnaanermut periarfissat

§ 47. Pisuni immikkut ittuni Kommunalbestyrelsi Avatangiisinut Naalakkersuisumut tusarniaareernikkut § 22, immk. 2-mik saneqqutsinissamik immikkut ittumik akuersissuteqarsinnaavoq.

§ 48. Pisuni immikkut ittuni Avatangiisinut Naalakkersuisoq kommalbestyrelsimut tusarniaareernikkut § 4-mik, § 6-imik, § 9-mik, §§25-26-mik aamma § 33, imm. 2-mik saneqqutsinissamut immikkut ittumik akuersissuteqarsinnaapput.

Maalaarutit

§ 49. Nalunaarut manna naapertorlugu aalajangiinerit tamarmik avatangiisit innarlitsaaliorneqarnissaannik Inatsisartut peqqussutaanni nr. 9-imi, 22. november 2011-meersumi, Inatsisartut inatsisaatigut nr. 1-ikkut 29. maj 2012-imeersukkut allannguuteqartinneqartumi kapitali 14-imi maleruagassat naapertorlugit maalaarutigineqarsinnaapput.

Pineqaatissiinermut atortuulersitsinermullu aalajangersakkat

§ 50. Akiliisinneqarsinnaapput:

1) § 4-mik, § 6-imik, § 8-mik, § 9, imm. 1-imik, imm. 2-mik aamma 4-mik, § 10, imm. 2-mik aamma imm. 5-imik, § 11-mik, § 12-imik, § 13-imik, § 14, imm. 1-imik, § 18, imm. 1-imik aamma 2-mik, § 21-mik, §§ 24-27-mik, § 28, imm. 1-3-mik, § 31, imm. 1-imik imaluunniit § 32-mik unioqutitsisoq.

2) § 23 imaluunniit §§ 37-44 naapertorlugit naalakkiutinik, peqqusissutinik, inerteqqutinilluunniit sumiginnaasoq.

3) malittarisassanik § 23, § 29, § 30 imaluunniit § 33 naapertorlugit aalajangersarneqartunik unioqqutitsisoq.

Imm. 2. § 15, imm. 1-3-mi piumasaaqatinik aalajangersarneqartunik unioqqutitsisoq akiliisinneqarsinnaavoq.

Imm. 3. Kalaallit Nunaanni pinerluttulerinermut inatsimmi maleruagassat naapertorlugit ingerlatsivimmut pisinnaatitaasumut pisussaataitaasumullu akiliisitsisoqarsinnaavoq.

Imm. 4. Akiliisitsissutit, imm. 1-3 naapertorlugu aalajangersarneqartut Nunap Karsianut tutsinneqassapput.

Atortuulersitsineq ikaarsaarnermullu maleruagassat

§ 51. Nalunaarut manna 1. januar 2014 aallarnerfigalugu atuutilerpoq.

Imm. 2. Tamatuma peqatigisaanik anartarfiit aamma imermik errortuivikumik anartarfiillu imaannik eqqaaneq pillugit Namminersornerullutik Oqartussat nalunaarutaat nr. 27, 17. september 1993-imeersoq atorunnaarsinneqarpoq.

Imm. 3. Anartarfiit aamma imermik errortuivikumik anartarfiillu imaannik eqqaaneq pillugit Namminersornerullutik Oqartussat nalunaarutaat nr. 27, 17. september 1993-imeersoq naapertorlugu kommunini maleruagassiarineqartut kommunalbestyrelsimit taakkuninnga atorunnaarsitsisinaanerisa tungaanut suli atuutissapput.

Namminersorlutik Oqartussat, ulloq xx. xxxxxx 2013

Miiti Lynge

/

Søren Stach Nielsen

Ilanngussaq 1

Ilanngussaq 1-imi qinnuteqarnissamut immersugassaq sulii suliarineqarpoq.